

悼 劉 莊

李 廣 源

劉莊先生字伊璜，山東泰安縣人，生於民國八年，雙親早世，賴祖叔撫育成；穎悟非凡，沈靜寡言，樂交遊，重情感。十二歲就讀泰安省立第三初級中學；十五歲考入山東省立濟南高級中學，課餘之暇，喜習網球，技術甚精。旋於民國廿五年，考入清華大學理學院地學系，每屆應考均名列前茅，深得師友之讚許。

迨盧溝烽火告警，凡屬中華兒女，莫不熱血沸騰，義憤填膺，一時救國運動，風起雲湧，伊璜鑒於國家興亡，匹夫有責，毅然參加神聖抗戰；櫛風沐雨，艱苦備嘗。嗣以學無根底，不足以言救國，遂於廿七年夏，輾轉數省，抵昆明入聯大復學，晨鐙篝火，未嘗稍懈，其抱負之宏遠，可想見矣。

是年秋，余識伊璜於聯大，因係同系同鄉，交誼彌篤。伊長余一級，每有所請益，必竭誠以告；以是，余於課業之肄習，獲益良多。伊性寬厚和平，藹然可親，談笑時，每蹙額斂眉，一似隱憂在抱者；實則無限天真，一往情深，有以使之然也。聯大借住雲南省立農業學校舍上課，樓房櫛比，院宇靜寂，伊璜常把卷，箕踞案下攻讀神采奕奕，興趣盎然。時或清歌一曲，陶然自適；蓋彼對文學，音樂之興趣，亦至為濃厚也。

翌年，聯大新校舍落成，余與伊璜隔室相望，同班課程較多，過從尤密，相與談笑，略無顧忌。伊天資聰慧，每科均取

冠軍。三年級課程雖多，仍能從容中矩。喜博覽文藝書籍，常至夜闌更深，始行就寢。卅年春，伊璜於昆明兩縣境內，做畢業論文，同行者有：高之秋，池際尚，二先生，計時半月，填繪一幅詳確五萬分之一地質圖；以其觀察之精細與夫搜集之豐富，系內諸師長咸稱傑作。同年夏，參加中國地質學會舉辦之各大學四年級論文比賽，中選第一。此為伊璜首次問世之論文也。

卅年夏卒業，入所前，伊於昆待命候車；時昆市迭遭轟炸，余班同學，均至崗頭村看岩石薄片。一日，伊璜因事謁鉄仙師，偕余同道返校，時夕陽銜山。碧空如洗，歸鳥翔空，和風怡人，曲徑踟躕，傾述衷情；伊璜雖會婉詞暢釋，余終難盡底蘊。最後語云：「情場勝如戰場」，余固知彼為一傷心人矣。離昆前一日，伊璜至余住處，屈膝傾談，臨去依依。余因次晨趕赴野外工作，未及送行，徒增悵惘耳！

同年九月，伊璜入所任調查員職，諸承各先進倡導，造詣甚遠，先後在四川威遠，甘肅，青海，等地，追隨王曰倫，李樹勳先生工作。卅二年本所西北分所成立於蘭州，伊璜於是年八月改任技士，受王曰倫先生指導，從事詳測阿干鎮煤田區口，雖匪風甚熾，仍能早期工作完成，其詳盡精確之程度，深為諸先進所賞識。

余與伊璜雖年來闊別，而信息常昭，相互報道生活情況，無殊往昔，卅二年秋，由蘭州來信云：「至西安省親，待心緒好轉，當詳述近況」。詎意同年十二月初，獲悉伊璜於西安因家事之牽累，與世長辭，噩耗傳來，為之唏噓者累日，如此聰慧有為之人，竟深陷於情感之旋渦中，而不能自拔，曷勝浩嘆，緬悵

昆市月下之別，竟成永訣。造化之無情，何若是其不可測耶！

伊璜死後，經家人付厝於西安城郊山東義地身後諸事，承諸友好妥爲料理，可謂仁至義盡，伊璜！伊璜！其知耶！其不知耶！

三十三年二月廿五日於北碚